



# झजलपा वाह्यो

JWOJALAPA WEEKLY

दैं ७ ल्याः ४५ (पूर्णडक १४७) ने. सं. ११३७ दिस्लाथ्व नवमि आइतवाः २०७४ असार १८ गते आइतवार (Jul- 02, 2017)

मू द १- पृष्ठ ६

## किपू नपा व प्राधिकरण कचवंपाखें लाःगु लिच्चः



पःखाः थुने न्ह्यः



पःखाः थुने धुकाः



हाकनं पःखाः दनाच्वंगु

### प्रहरी तथा प्राधिकरणया पःखः थुने, सशस्त्र प्रहरी तथा हाकनं पःखाः दयेकल

#### ज्वजलपा वाःपौ/

केन्द्रीय सरकार अन्तर्गतया नेपाल विद्युत प्राधिकरणया किपू शाखा व स्थानीय सरकार किपू नगरपालिकाया दथुइ प्राधिकरणया पःखाःयात कया विवाद जूगु दु । जनप्रतिनिधि वये धुनेवं तःगःवःपिया विद्युत प्राधिकरणया पःखाः थुनेगु ज्या किपू नगरपालिकां याःगु खः । किपू नगरपालिकां नेपाल विद्युत प्राधिकरणया पःखाः स्वीकृत भवन नापं लै सम्बन्धी मापदण्ड कथं मदुगु विद्युत प्राधिकरण किपू शाखाया स्वामित्वयुक्तकं मदुगु, सतकया मापदण्ड कथं जवय् व खवय् ९/९ मिटर जुइमाःगु मदुगुलिं पःखाः थुनेमाःगु अवस्था जूगुलिं पःखाः थुनागु खः

धकाः किपू नगरपालिकां धाःगु दु । किपू नगरपालिकां प्रहरीयात न्ह्यःने तथा प्राधिकरणया पःखाः निगू चरण याता थुनेगु ज्या याःगु खः । पःखाः थुनेगु ज्या याःगु विरोधय् प्राधिकरण पक्ष अदालतय् वंगु खः । अथे हे मेगु दिनय् नं पःखाः थुनेगु ज्या याःगु खःसा अनं लिपा प्राधिकरण मानहानी मुद्दा ज्वना हाकनं अदालतय् वंगु खः । अनं लिपा प्राधिकरण काउन्टर तर्क बन्द यात ।

अले सूचं हे पिकया ध्यबा पुलेगु ज्या मेगु थासय् यायेत जानकारी बिल उकिं याता सर्वसाधारणयात दुःख जूगु खः । कन्हय् खुनु हे हाकनं प्राधिकरण ला किपू नगरपालिकापाखें ल्यंदनिगु ध्यबा पुलेत

मवल धकाः लाइन काटेयाना बिउगु खः । उकिं याता छन्दु तक किपू नगरपालिकाया ज्या तक प्रभावित जूगु खः । अनं लिपा गाविस कालया १ लाख ९८ हजार ७ सय ४८ तका दां बक्यौता प्राधिकरणया फौपिया ज्याकुथिइ वना पुलेगु ज्या जूगु खः । अले नगरपालिकाय् मत वःगु खः । आः वया सशस्त्र प्रहरीयात हे सुरक्षा बिया शुक्रवाःनिसें विद्युत प्राधिकरणया पःखाः हाकनं दनेगु ज्या याःगु दु । थुगु कथं किपू नगरपालिका व प्राधिकरणया विवाद गुगु कथं ज्यनीगु खः अले जनतायात दुःख विइगु ज्या गवले बन्द जुइगु खः धकाः स्थानीयवासी पियाच्वंगु दु ।

## ADMISSION OPEN!

### +2 SCIENCE & MANAGEMENT

Special Discount for South Region Topper

#### Salient Features

1. Well- equipped biology, chemistry and physics labs.
2. Computer lab with internet facility.
3. Homely and natural school environment.
4. Experience and dedicated teachers.
5. Smart classes (Digital classes)
6. Career development and counselling facilities.
7. Homely and hygienic canteen facility

Entrance Date: 2074/03/23

S.No.	GPA (SEE or Entrance Exam)	Monthly	Annual Fee	Registration
1	3.91 to 4.00	100%	75%	75%
2	3.71 to 3.90	75%	75%	50%
3	3.61 to 3.70	50%	50%	50%
4	3.41 to 3.60	50%	50%	25%
5	3.21 to 3.40	25%	50%	
6	3.01 to 3.20	25%	30%	
7	2.81 to 3.00	25%	20%	
8	2.61 to 2.80	20%	20%	
9	2.41 to 2.60	10%	20%	



**RARAHIL MEMORIAL SCHOOL**  
राराहिल मेमोरियल स्कूल  
Kirtipur, Kathmandu, Nepal  
Contact No. 4330121

Be Smart. Be Good

Email: rarahil@mail.com.np Ph: 4331248, 4331249





## ज्वजलपा वाःपौ

सल्लाहकार

श्रीकृष्ण महर्जन

प्रकाशकः

नजरराम महर्जन

सम्पादक

श्रीकृष्ण तण्डुकार

ले-आउटः

ज्वजलपा डेस्कटप

संवाददाता

भरत महर्जन, निरजमान सिंह

थाकू

प्रिन्ट स्काई, यें

ज्याकूः निखासी त्वाः किपू नपा-३

फोन न्याः ४३३३००७, ९८४९४०९०७७

ई-मेल : jwojalapaweb@gmail.com

### सम्पादकिय

## किपू नगरपालिकाय् नेवाः भासं निवेदन बिइगु खँय्

किपू नगरपालिका नेपालभाषायात न कामकाजी भाषाया रुपय् मान्यता बिइगु धकाः गुगु कथं निर्णय यात थ्व लसताया खँ खः । किपू नगरपालिका स्थापना जुइ धुनेव हे थनि भिँच्यादैसिबे न्हयः हे नेपालभाषायात कामकाजी भाषाया रुपय् मान्यता बिइ धुँकूगु खःसा थुगुसी स्थानीय तहया निर्वाचन जुया न्हूगु निर्वाचित जनप्रतिनिधित वये धुनेव हे न्हापांगु बैठक नेपालभाषायात न सरकारी कामकाजी भाषाया रुपय् मान्यता बिइगु ज्या याःगु दु । उकिं किपू नगरपालिकाया नेवाःतयगु निति तःधंगु लसताया खँ खः ।

थ्व हे दथुइ नेपालभाषा किपू नगरपालिकाया वडा नं. १० सं स्थानीयवासी योग दिवसया निति आर्थिक ग्वहालिया निति नेपालभाषा निवेदन बिउगु खँ पिहाँ वःगु दु । नेवाःतयसं थःगु हे माभाष नेपालभाषा हे निवेदन बिइगु ज्या गुगु कथं यात व तस्कं लसकुस याये बहःगु खँ खः । आःया अवस्थाय् वडा नं. १० या ज्याकुथिइ जक मखु मेमेगु वडा नाप नाप नगरपालिकाया ज्याकुथिइ तस्कं नेपालभाषा निवेदन तयेगु ज्या न्ह्याकेगु निति नेपालभाषाया कार्यकर्तातयसं अभियानया रुपय् हे न्ह्याकेमाःगु अवस्था दु ।

किपू नगरपालिकाय् फारम भरे यायेगु खय् भाषं जुयाचवंगुयात भाय् हिला नेपालभाषा तयार याये धुँकूगु अवस्था व आः उकियात छापेयाना हयेगु जक ल्यंजनि । उकिं किपू नगरपालिका न खय् भासं जक जुयाचवंगुयात नेपालभाषा न हिला छापेयायेगु ज्या याकन यायेमाःगु अले किपूया नेपालभाषाया कार्यकर्ता नाप नेपालभाषाप्रति मतिना यानादीपि नेवाःतयसं नेपालभाषा हे निवेदन बिइगु ज्यायात तिब्रता बिइमाःगु आवश्यकता दु ।

### गजल शौरभ शाक्यया

गजल-३६



छकूचा निभाःवइव्यु जिथाय् नं  
खूँ बिसिका छवइव्यु जिथाय् नं ।  
जिगु नुगःया चकंगु क्यवय् नं  
वालाःगु स्वां त्वइव्यु जिथाय् नं  
सुपाँय् नं त्वपूया खूँसे चंगु सर्गतय्  
कुलां न्यंक चकका त्वइव्यु जिथाय् नं ।  
स्यासां अय्या धायेमफूत जि थौं  
छ दःखःसा करणां स्वइव्यु जिथाय् नं ।  
बिडंबना जायाचवंगु जिगु परिवेस  
धैर्य, साहसया जः खइव्यु जिथाय् नं ।

## छवय्ला नयाः क्यान्सर जुइ ला २



रोशन श्रेष्ठ

बंगु वाःया ल्यंगु

जापानया मनुत ला नइबलय् थःगु न्हयने मि च्याका अन हे ला पुकाः छुयाः नइगु जुया ला नाप नापं कुँ नं इमिसं उतिकं हे म्हय् दुछवया च्वनी । अले बरोवर थथे याना ला नइबलय् इमिगु म्हय् बेन्जोपाइरिनया असर तच्चया वंगु खयेफु धैगु जिगु अनुमान जुल ।

अथे जुया हे जापानिजतयत् यक्व क्यान्सर जुइगु जुइ । जर्मनि, मंगोलिया व बोलिभिया नं यक्व ला छुया नइपिं खः, तर अन क्यान्सर उपायच्व मदु । अन इमिसं ला नापनापं नइगु बेटा क्यारोटिन, भिटामिन सि व खनीज दूपातिइ सागसञ्जिया कारणं नाइट्रोसमाइनया असर मजू ।

न्ह्यागु ला छुयेबलय् पिहाँ वइगु कुँइ नं उतिकं बेन्जोपाइरिन दइ धैगु नं मदु । गजाःगु ला, गुलि तापक्रमय् गुकथं छुल कि बेन्जोपाइरिन यक्व पिहाँ वइ धका नं अध्ययन जूगु दु । विशेषयाना दाः (एनिमल फ्याट) यात हाइ कार्बन मिक्सनाप तया छवयेकल धाःसा यक्व बेन्जोपाइरिन पिहाँ वइगु जुइच्वन । अथे धयागु मतलब छु धाःसा यक्व दाः दुगु ला यात ह्यंगवाः वा

कोइलाया मिं छुल धाःसा दाः कना वया ह्यंगवालय् तिकि ननि । अले अन हे हाकनं दाः छवया कुँ वइबलय् ह्वार ह्वार बेन्जोपाइरिन पिहाँ वइ । थ्व तस्कं मनी जुया च्वन । तर थथे दाः छवल्कि छुयाःतःगु लाया रंग सिइसे च्वना बाँलाइगु, अले ला नं रसिलो जुइगु, बास नं बाँलाइगु जुया अजाःगु ला तस्कं थिके । जापानया कोबे बिफ धयागु जालि थें दाः दैगु ला अथे छुया नयेबलय् साइगु जुया तस्कं थिके । एक किलोया २० टुः तका भाः जुल धाःसा दंक लात धाइ । ४० टुः ५० टुः तका भाः थ्यं । थुलिइ खँ सिइवं भीगु छवय्लाया खँ ल्हाये । वास्तवय् भीगु छवय्ला तस्कं हे स्वास्थ्यवर्धक जुइच्वन खनी सा । भी पुर्खापिन्सं यक्व हे विचाःयाना थ्व छवय्लाया परिकार दयेकुगु जुयेमाः । छाया धाःसा

१- दकले न्हापां छवय्ला म्येय् या ला या दयेकिइ । म्येय् या ला तस्कं म्हो दाः दुगु ला खः । अलय् भीसं छवय्ला छुयेत फयां फक्व दाः मदुगु नलू ला ल्यइ । दाः म्हो जुल कि बेन्जोपाइरिन नया सम्भावना नं म्हो जुइ ।

२- छवय्ला छुयेत भीसं दुसू वा गसू छयली । थ्व दुसुलिइ सुया छवय्ला छुइबलय् छवय्ला पाखें पिहाँ वइगु ति व दाः अपुक कुतुं वनी । दाः च्याना छवय्ला नतुं प्यपुनीगु अर्थात नाइट्रोसमाइन थाइगु सम्भावना दइमखु ।

३- छवय्ला छुयेत भीसं ह्यंगवाः वा सिं वा कोइला च्याकी मखु । अप्वः धया थें सु, छवाली दुया छवय्ला छुइ । सु छवाली च्याये धुंका नौ जुया क्वथ्यंक च्वनीगु जुया नौली कुतुंवंगु दाः पाखें

पिहाँ वइगु बेन्जोपाइरिन छवय्लायात असर याइमखु ।

४- छवय्ला भीसं खूला थासय् छुइ । भुतू वा छेलि थें गुम्म जूगु थासय् छवय्ला छुइमखु । छाया धाःसा छवय्ला छुइबलय् पिहाँ वइगु कुँइ बेन्जोपाइरिन दुसा उइत खूला थासय् च्वयेकाः छवयेबलय् भीत असर याइमखु ।

५- थथे छुइचुंका नं भीसं छवय्ला तप्यंक नइमखु, उकिं थी थी मसला तइतिनि । व मसलाय् जी, पालु व हलू मदयेक मगाः । थ्व स्वतां मसलात सेल ड्यामेजयात भिँकेत तस्कं उपयोगि मसला धका नां जाः ।

६- छवय्ला छुइगु तरिकाया कारणं नाइट्रोसमाइन दैगु सम्भावना तस्कं म्हो दु । यदि दत धाःसा नं छवय्लाया ल्वाकछयाइगु कचिलावा व धनियाया हुनिं छुं नं असर जुइमखु ।

आः थुलिमछि खँ कथं सुरक्षित व सावधानि कयाः दयेकिइगु भीगु नेवाः छवय्ला नया क्यान्सर जुइ धकाः ग्याये माःला ? जि ला आः छुफुति नं मग्याः । वास्तवय् भीगु छवय्ला तस्कं हे स्वास्थ्यवर्धक जुइच्वन खनी सा । भी पुर्खापिन्सं यक्व हे विचाःयाना थ्व छवय्लाया परिकार दयेकुगु जुयेमाः । थुलिमछि खँ कने धुंका जिं छिर्कापिन्त आः धायेमाली मखु जुइ, बरु ह्यंगवाःलय् छुयाः दयेकाःतःगु सेकुवाः नयेगु मनी, व सेकुवा नइपिन्त सिबे छुइपिन्त क्यान्सर जुइफु । तर भीगु नेवाःपहकथं दयेकाः तःगु छवय्ला नयेत छुं नं चिन्ता कायेम्बाः । भीगु छवय्ला नया क्यान्सर जुइ धयागु खँ जिं विश्वास मयाना । छि याना ला ? क्वचाल



### पुखू सफाई अभियानः

किपू नगरपालिका वडा नं. ३ या खासी बजारय् च्वंगु स्वंगू पुखू भिं पुखू, मभिं पुखू व लाभा पुखू मध्ये लाभा पुखू व मभिं पुखू ल्हानातःगु चा लिकायेगु अभियान न्ह्याकाच्वंगु दु । न्हापां लाभा पुखूया चा लिकायेगु ज्या याःगु खःसा लिपांगु इत्य वया मभिं पुखुलिइ च्वंगु चा लिकायेगु ज्या न्हिया न्हिथं जुयाच्वंगु दु । किपू नगरपालिका वडा नं. ३ ज्याकूया पहलय् उगु कथं चा लिकया चा बसपार्कय् वाये यंकेगु ज्या यानाच्वंगु दु । तःभुखाय् ब्वया दुना वःगु छें व पिउगु छेंया चा मभिं पुखुलिइ ल्हाना तःगु खः । अथे हे भिं पुखुलिइ धाःसा चा ल्हाना मतःगु अवस्था खःसा अन तःभुखाचं पीडित मनुतयसं टहरा दयेका च्वनाच्वंगु खः । पुखूया दक्षिणपाखे व उत्तरपाखेया टहरा चीकेगु ज्या जुइ धुँकूगु दुसा आः पश्चिमपाखेया जक ल्यंजनि । पश्चिमपाखे टहरा दयेका च्वनाच्वंम मनुया च्वनेगु थाय् हे मदया जक टहरा चीकेगु ज्या मजयाच्वंगु खः धकाः धाःगु दु । किपूया थ्व स्वंगू हे पुखुलिइ लः तया किपू नगरपालिका आकर्षक दयेकेगु योजना दयेकूगु दु ।



## मङ्गल मा.वि. बधाई व दिक्षान्त समारोह

ज्वजलपा वाःपौ/

किपूया मङ्गल मा.वि. एसईई पास जूषिं थः विद्यार्थीपिन्त छगू ज्याभवःयासं दिक्षीत यासं भिन्तुना देछाल ।

वंगु असार १५ गते विहिवाः कक्षा १०य् व्वनाच्वम्ह अपर्णा उपाध्यायया सभानायोसुइ जूगु उगु ज्याभवःया मूपाहाँ किपू न.पा.या मेयर र मेश महर्जनं त्वारवाल्य् मत च्याकाः उलेज्या यानादिल । मेपिं पाहाँपिं खः विद्यालय निरीक्षक मोती राज खनाल, श्रोत व्यक्ति बासुदेव रेग्मी, मङ्गल बहुमुखी क्याम्पस प्रमुख प्रदीप महर्जन, वि.व्य.स. नायो अमन महर्जन व सिरपाः दातापिं, विद्यालय व्यवस्थापन समितिया दुजःपिं दुगु खः ।

एसईई पासजूषिं विद्यार्थीत मार्चपास यानाः थःथःगु थासय् फेर्तुई धुंकाः राष्ट्रिय गान, लसकुस म्ये हायकाल । सहप्रधानाध्यापक नीलकण्ठ महर्जनं लसकुस न्वचू बियादिल ।

मूपाहाँ मेयर रमेश महर्जनं विद्यालय उत्कृष्ट ल्याः हयाः पासजूषिन्त सिरपाः लःल्हानादिसं थःगु न्वचूतय्गु भवलय् धयादिल “उच्च शिक्षाया लागि विषय ल्ययबलय् मेपिनिगु लहलहैलय् मवसं थःत यःगु विषय व्वनाः विशेषज्ञता प्राप्त यायेगु सल्लाह बियादिल ।



## इनाप

ज्यापु समुदायया प्रतिस्थित व्यक्तित्वतय्गु सफू पिकाय्गु नितिं क्वय् न्यथनाकथंया विधाय् दुध्याःपिं व्यक्तिपिंसं थःथःगु बायोदाता (C.V) इलय् हे बियादीत इनाप यानाच्वना ।

१. मन्त्री, २. सभासद ३. राजदूत, वाणिज्यदुत, कन्सुलर, ४. पि. एच. डि. डाक्टर ५. एम.बि.बि.एस डाक्टर, वि.ई नर्सिंग, डेन्टिस्ट, फर्मासेप्ट, ६. वि.ई. इन्जिनियर, ७. प्राध्यापक क) स्कूल (माष्टर डिग्री) ख) विश्वविद्यालय ग) चार्टर्ड एकाउन्टेन्ट, लेखा परिक्षक (माष्टर डिग्री) ९. न्यायाधीश सिनियर अधिवक्ता, १०. पाइलट, ११. सेकेण्ड क्लास अफिसर, नेपाल सरकार व वित्तिय संघ संस्थानया क) जि.एम. ख) सि.ई.ओ, ग) सेकेण्ड क्लास अफिसर, १२. फाइन आर्ट, १३. कलाकार, १४. खेलाडी १५. उच्चपदय् च्वना समाजसेवा, १६. उच्चपदय् च्वनाः विभिन्न विधाय् ज्यायाय् धुंकीपिं

स्वापूया निति

नजरराम महर्जन

निखासी, न्हूबजाः, किपू-१०

फोन नं. ९८४१४०१०७७

अथेहे विद्यालयया कोअर्डिनेटर सिद्धिबहादुर महर्जनं मङ्गल स्कूलया थुगु सफलताया निति विद्यार्थी, अभिभावक, शिक्षक व व्यवस्थापन समितिया तःधंगु ल्हाः दु । थुगु एकता व सफलता न्ह्याबलें दयाच्वनेमा धयादिल ।

उगु ज्याभवलय् दकलय् अप्वः ल्याः हयाः पासजूषिं विद्यार्थीपिं नन्दन सिंह व रुस्तम काफ्लेयात थीथी नगद सिरपाः नापं दसिपौ लःल्हाःगु खः । अष्टमाया गणित सिरपाः भरत बहादुर महर्जन, नीलकण्ठ सिरपाः नीलकण्ठ अमात्य, रत्न साईन्स सिरपाः रत्नबहादुर महर्जन, लोक विज्ञान सिरपाः लोकलाल महर्जन, कृष्ण हिरा सिरपाः पूर्णबहादुर महर्जन, पंचुलाल सिरपाः धौमई महर्जन, दिल चन्द्र निरन्तर सिरपाः अशोक महर्जन, रोनेट डट कम सिरपाः रोनेट महर्जन, ज्यानमाया स्मृति सिरपाः भावना महर्जन, ओम पदक कोअर्डिनेटर सिद्धिबहादुर महर्जन सिरपाः बियादीगु खः ।

मङ्गल नगद सिरपाः नन्दन सिंह जीपिए ३.६५, रुस्तम काफ्ले ३.६५, मनिसा रावत जीपिए ३.६ व ओम कुमार पाल जीपिए ३.६ पिन्त ब्यूगु खः । निमित्त प्रधानाध्यापक लोकलाल महर्जनं सुभाय् न्वचु बियादीगु खः । उगु ज्याभवः लिपा विद्यार्थीतसं थीथी सांस्कृतिक ज्याभवः न्ह्यब्वःगु खः ।

## हिलटाउन स्कूलया बिदाई व अभिनन्दन ज्याभवः



ज्वजलपा वाःपौ/

किपू नगरपालिका वडा नं.१ बाघभैरवस्थानय् च्वंगु हिलटाउन मा.वि. थुगुसी एसईई पासजूषिं थः विद्यार्थीपिन्त बिदाई व किपू नगर पालिकाया नवनिर्वाचित मेयर र मेश महर्जन, उपमेयर सरस्वती खड्का, वडा नं.१ या वडाध्यक्ष हर्ष महर्जन, वडा नं.२या वडाध्यक्ष रमेशमान डंगोल, वडा नं.३ या वडाध्यक्ष राजेन्द्र महर्जन, वडा नं.७या वडाध्यक्ष राजकुमार माली व वडा नं.१० या वडाध्यक्ष अमन महर्जनपिन्त अभिनन्दन याःगु खः ।

स्कूलया व्यवस्थापन समितिया नायः हिराकाजी महर्जनया सभानायःसुइ न्ह्याःगु उगु ज्याभवलय् मूपाहाँ स्कूलया संस्थापक प्रिन्सिपल प्रा.डा. हिराबहादुर महर्जनं त्वारवाल्य् मतच्याकाः उलेज्या यानादीगु खः । प्रिन्सिपल राजन तण्डुकारं स्कूलया छकूचा म्हासिइका बिसं लसकुस न्वचू बियादीगु खः । विशेष पाहाँ किपू नगरपालिकाया प्रमुख रमेश महर्जनं थःगु नुगःखँ

तयेगु भवलय् एसईई परीक्षाय् ताःलाःपिं विद्यार्थीपिन्त प्लस टु ब्वनेबलय् थःत यःगु विषय ब्वनेत इनाप यानादिसं सुयागु कर काप, दबाव व लहलहैलय् वनाः छुं विषय ल्ययाः ब्वनेगु यायेमते । थःत छु विषय यःगु खः, वहे विषय जक ब्वं, उकी हे छिमिगु भविष्य सुलाच्वंगु दइ धयादिल ।

उगु ज्याभवलय् सभाः नायः हिराकाजी महर्जनं २०७३ सालया एसईई परीक्षाय् ताःलाःपिं विद्यार्थीपिन्त खादा न्ययेकाः व एसईई परीक्षा ताःलाःपिं विद्यार्थीपिनिगु पुचः दुध्याःगु किपाः लःल्हानाः सम्मान यासं बिदाई ज्याभवः याःगु खःसा हिलटाउन स्कूलपाखें एसईई परीक्षा २०७३ य् उत्कृष्ट निम्ह विद्यार्थी सलिना महर्जन व प्रशंसा खड्कायात मूपाहाँ प्रा.डा. हिराबहादुर महर्जनं दसिपौ व नगद सिरपाः लःल्हानादीगु खः ।

अथेहे, सभानायः हिराकाजी महर्जनं किपू नगरया नवनिर्वाचित मेयर रमेश महर्जन व उपमेयर सरस्वती खड्काया

लिसं वडाध्यक्षपिं १ वडाया हर्ष महर्जन, २ वडाया रमेशमान डंगोल, ३ वडाया राजेन्द्र महर्जन, ७ वडाया राजकुमार माली व १० वडाया अमन महर्जनयात खादा क्वखायेकाः दसिपौ लःल्हानाः अभिनन्दन व सम्मान यानादीगु खः ।

ज्याभवलय् हिलटाउन स्कूलया एसईई टपर सलिना महर्जनं थःगु स्कूल जीवनलिसे स्वापू दूगु चिनाखँ न्यकादीगु खःसा एसईई परीक्षाय् ‘ए’ ग्रेड पास जुइत ताःलाःम्ह लसता शाक्य व मेम्ह एसईई टपर प्रशंसा खड्कां थःथःगु नुगःखँ तयादीगु खः । ज्याभवलय् किपूया डिएसपी टेकबहादुर कार्की, ज्याभवःया मूपाहाँ प्रा.डा. हिराबहादुर महर्जन, शिक्षाविद् प्रा.डा. रामकृष्ण महर्जनपिन्सं थःथःगु नुगःखँ तयादीगु खः ।

सहप्रधानाध्यापक दिनेश महर्जनं सुभाय् न्वचू बियाः सभानायः हिराकाजी महर्जनं छत्वाःचा नुगः खँ तयाः सभा क्वचाय्का दीगु खः ।

## किपू वडा नं. १० या

## ज्याकुथिइ नेवाः भासं


## निवेदन

ज्वजलपा वाःपौ/

किपू नगरपालिका वडा नं.१० स न्हापांखुसी थःगु मां भासं अर्थात नेवाः भासं निवेदन बिइगु ज्या जूगु दु ।

किपू नगरपालिका दुने च्वंगु सामुदायीक भवन क्वाःक्वय् नेपाल संवत् १९३७ तछलागा १२ बुधवाः विश्व योग दिवस खुन्हु योग साधाना समाज किपू व जीवन विज्ञान किपू केन्द्रया मंकाः ज्याभूवः कथं योग विज्ञान शिविरया नितिं माःगु कथंया ग्वहालि यायेगु नितिं उगु कथंया पौ बिइगु ज्या जूगु खः ।

योग विज्ञान शिविरया कजि ज्ञानबहादुर महर्जनं नेपाल संवत् १९७३ दिवसाध्व सप्तमी खुन्हु उगु निवेदन वडा १० या ज्याकुथिइ दर्ता याःगु खः । किपू नगरपालिका वडा नं. १० स



संभवत न्हापांखुसि नेवाः भासं निवेदन बिइगु ज्या जूगु खने दु ।

थुगु हे कथं नेवाःतयसं नेवाः भासं हे ज्याकुथिइ निवेदन बिइगु ज्या याना यंकेमाः धकाः सरोकारवालात नेपालभाषाया कार्यकर्तातयसं सकलसित इनाप नं याःगु दु ।



**न्हापा न्हापायापिं मनूतय्सं  
फोहरयात विसर्जन यायेगु  
दिं हे क्वःछिना अथे गथांमुगः  
नखः सलंसःदैँ न्ह्यःनिसें  
नेवाःतय्सं हना वयाच्वंगु  
नखः खः धकाः नाला  
कायेफु । उलि जक मखु मूल  
ज्या कथं नालातःगु वा  
पिङ्गु ज्या सिनाज्या क्वचाल  
धकाः घोषणा याइगु अले  
मनोरंजनया नितिं गुंला लाखे  
पिकायेगु ई वल धकाः बिङ्गु  
संकेत खः गथांमुगः नखः ।**



# सिनाज्या व नेवाः संस्कृति



श्रीकृष्ण महर्जन

बुँज्याया दक्ले महत्पूर्णगु व कठिन ज्या कथं नालातःगु दु नेवाः समाजय् वा पिङ्गु ज्या । वा पिङ्गु ज्या धइगु सिना सिना यायेमाःगु अर्थात तसकं महत्व बिद्या यायेमाःगु जुया हे सिनाज्या धाःगु खयेमाः । विशेष याना वा वःगुया भरय् बाय् धलंवःगु, खुसिंवःगु बाय् पुखुलिङ मुंकातःगु लःयाभारय् वा पिकइगु ज्या यायेमाःगु बाध्यता स्वनिगःया आदिवासी नेवाःतयगु खः । वा वःगु इलय् हे यायेमालीगु ज्या सिनाज्या यायेगु ई धइगु सिन्खः अर्थात सिथि नखःनिसें गथांमुगः नखः तकया दुने खः । भ्वःछि भ्वःछि हे बुँड वना ज्या याइगु ई धइगु सिनज्याया ई खः । नेवाः परम्परा कथं सिथि नखः अर्थात सिन्खःनिसें सांस्कृतिक बाजं थाइमखु । फल्चा फल्चाय् दाफा थायेगुनिसें सांस्कृतिक बाजं तर्क थाइमखु । छुं नं कथंया प्याखं, बाजिनिसें म्ये हालेगु तर्क याइमखु । सिन्खःनिसें सिनाज्याया नितिं बुँज्याय् व्यष्ट जुङ्गु ई जुया हे जुइ सायद अथे सांस्कृतिक बाजं मथाइगु । अले गथांमुगः नखः न्ह्यः छुं नं कथंया बाजं थाये मजिउ धइगु जन विश्वास दु । फुक्क शक्तिनिसें तन मन धन तर्क बुँज्याय् केन्द्रीत यायेमाःगु ई जुया हे जुइ अथे सिन्खःनिसें गथांमुगः नखः न्ह्यः तर्क बाथं थाये मजिउ धयातःगु । उकिं सिनाज्याया इलय् मनोरञ्जनयात तर्क खास हे महत्व बिङ्गु यानाच्वंगु मदु धायेछिं ।

सिनाज्याया इलय् याइगु थीथी कथंया संस्कृति नाप नापं महत्वपूर्णगु दिं धइगु सिन्खः अर्थात सिथि नखः, ज्या पुन्हि, भलभल अष्टमी, भाराखः अर्थात भार । नखः व गथांमुगः नखः खः । अथे हे थाय् विशेष कथं धायेगु खःसा किपुलिङ बाघभैरव जात्रा नं सिनाज्याया इलय् लानाच्वंगु दुसा पन्तिया जात्रा नं व हे इलय् लानाच्वंगु खने दु । सिनाज्या नाप स्वापू दुगु थीथी कथंया दिं व संस्कृति थुगु कथं दु ।

## सिथि नखः

तछलाथ्व खष्टमी खुन्हु नेवाःतय्सं सिन्खः नखः हना वयाच्वंगु दु । सिन्खः धइगु क्वचाःगु नखः खः धाइ । म्हाय् मचा नखः नं धायेगु याना वयाच्वंगु सिन्खः अर्थात सिथि नखः खुन्हु बुँड साः छक्सां तःवने माः धइगु मान्यता दु । उकिंया अर्थ सिथिनखःनिसें सिनाज्या सुरु जुगु कथं नालीगु खः । अले सिन्खः खुन्हु हे लःया मुहान बुंगाः, ल्वहीहिं, तुं, पुखू तर्क सफा याइ । अले साःगाःनं सफा याइ । व हे साः बुँड तये यंकीगु खः । नसाया ल्याखं थुखुन्हु माय्, मू, कःसू नापं थीथी कथंया बुवःया वः दयेका नयेगु याइ । म्हाय् मस्तय् छें सःताः सिनाज्याया नितिं सहलह ब्याकेगु अले व छुना नकीगु नखःया रुपय् नालातःगु दु । अथे हे सिन्खः खुन्हु फयगुलिङ तर्क हिङ्केगु नापं थःथःगु छेलिङ भूमि पुजा याइगु तर्क चलन दु । थ्व धइगु भूमि पुजा, लः पुजा नापं वातावरणयात पुजा याइगु दिं कथं नालातःगु दु ।

## ज्या पुन्हिः

ज्यापुन्हि खुन्हु मल्ल कार्लनिसें न्हयानाच्वंगु परम्परा कथं अन तत्कालिन यलया जुजु श्रीनिवास मल्लया लुं सियातःगु आकर्षक सिंहाशान ब्येयेगु, पौभाः ब्येयेगु नाप नापं श्रीनिवास मल्लं च्यावंगु धकाः नालातःगु मेघ मल्हार म्ये हालेगु चलन दु । ज्या पुन्हि खुन्हु छने मगाःम्ह मिसा व ज्या याये मगाःम्ह मिजं नं गबले सुख सिङ्मखु धइगु मान्यता तर्क नेवाः समाजय् दु । ज्या पुन्हि खुन्हु न्हिच्छि हे ज्या याये मजिउ धइगु मान्यता नं आः तर्क नं दनि । मंगलय् च्वंगु लायकू न्ह्यःने कृष्ण मन्दिर या फलय् यलया तत्कालिन जुजु श्रीनिवास मल्लया सिंहाशान ब्इगु चलन दु । कलात्मक नापं लुं सियातःगु सिंहाशान ज्या पुन्हि खुन्हु छन्हु जक सार्वजनिक रुपं ब्इगु खः । न्ह्यःने जवं खवं निम्ह निम्ह किसिया छःने सिंह छम्ह छम्ह तयातःगु अले सिंहया ल्यूने धाःसा कदम सिमा तयातःगु दु । सिंहाशान तत्कालिन अवस्थाय् यलया उकु बहाःया जोधाजु शाक्य सम्यकया श्रीनिवास मल्लयात लःल्हाना बिउगु खः धाइ । कृष्ण मन्दिरय् बिलपौ ब्येयेमाःगु चलन दु ।

बिलपौ धइगु पौभाः खः । लायकुलिङ खिं वजां थाना अर्थात दाफा थाना थीथी कथंया म्ये हालेमाःगु चलन दु । श्रीनिवास मल्लं च्यावंगु मेघ मल्हार म्ये अनिवार्य रुपं हालेमाः । न्हयगू तँ दुगु थुगु म्ये तसकं थाहां वना व तसकं क्वहां वना हालेमाःगु म्ये खः । थौकन्हय् मेघ मल्हार म्ये पूर्वक हालेफुपिं मदये धुंकल । अयनं उगु म्ये गुलि फु उलि हालाच्वंगु दु । मेघ मल्हार म्ये पूर्वक हालकी वा वइ धइगु जन विश्वास दु । मेघ मल्हार म्येय् कृष्णया लिलायात वर्णन यानातःगु दु । श्रीनिवास मल्लं च्यातःगु मेघ मल्हार म्ये नाप नापं स्वीछुपु म्ये हालेमाःगु मान्यता दु । तर थौकन्हय् धाःसा उलि मछि म्ये हालेगु यानाच्वंगु अवस्था धाःसा मदु ।

## पन्तिया जात्रा

ज्या पुन्हिया इलय् पन्तिङ जात्रा जुइगु जुया पन्तिया स्थानीय मनूतय्सं थुगु पुन्हियात पन्ति पुन्हि धकाः नं धायेगु याना वयाच्वंगु दु । विशेष याना सिनाज्या यायेमाःगु ई अले सिनाज्या यायां हे जात्रा हनीगु जुया हे ज्या पुन्हि धाःगु खः धइगु जनधारणा दु । पन्तिङ जात्रा धाइगु महाद्यः अर्थात इन्द्रेश्वर महाद्यः, भद्रकाली, भैर व अर्थात उन्मन्त भैरव व ब्रम्हायणी द्यःया जात्रा खः । थुगु कथं प्यम्ह द्यःया जात्रा खःसा भैरव व भद्रकालीया रथ साला जात्रा याइगु खःसा महाद्यः व ब्रम्हायणीया जात्रा धाःसा द्यःखः कुबिया याइगु खः । सांस्कृतिक बाजं थाना याइगु थुगु जात्रा हे पन्तिया दक्ले महत्वपूर्णगु जात्राया रुपय् नालातःगु दु ।

## मचाति जात्रा

छुं नं कथंया ख्वाःपाः पुया प्याखं ल्हइगु जात्रा नेवाःतय्सं क्वचायेकीगु दिं धइगु भलभल अष्टमी खुन्हु खः । दैय् दसं भलभल अष्टमी खुन्हु यँया ऐतिहासिक नापं सांस्कृतिक रुपं महत्वपूर्ण वस्ती ग्वल अर्थात पशुपति लागाय् मचाति जात्रा याइगु चलन दु । थुगु जात्रायात त्रिशुल जात्रा नं धायेगु याना वयाच्वंगु दु । ग्वलय् थुगु अजूचाइपुगु जात्राया भवलय् न त धिमे थाःसः दइ न त वासुरी हे पूगु सः ताये दइ । समान्य तया जात्रा धाये धुनेवं हे धिमे थायेगु निसें वासुरी पुइगु तर्क याइ धकाः

मनूतय्सं थुइकी । तर ग्वलया मचाति जात्राया भवलय् दक्ले न्ह्यःने सिमाकचा ज्वना मस्त म्वः म्वः वइ । अले इमिसं न्हयलाथे यमितय् ब्वः बिद्या वनेगु याइ । थुगु जात्रा यँमितय्सं स्वये मजिउ नं धाइ । जात्राया भवलय् द्यःखः जात्रा ल्यून् मनुयात सिथं यंके थें हे याना क्वबिया यंकीगु चलन दु । देवं फायेका अथे सिथं यंकीगु खः । उकिङ दुने धाःसा मूस्वायात भूमि आचाजुया प्रतिक कथं तयेगु याना वयाच्वंगु दु । सिथं यंकीगु धइगु राजेस्वरी घाटय् यंकेमाःगु चलन दु । पशुपति अर्थात ग्वल लागाय् दैय् दसं भलभल अष्टमी खुन्हु मचाति जात्राया भवलय् स्वखः द्यःखः कुबिया जात्रा याइगु चलन दु । आर्यघाट लिक्क लाग्ना बछ्लेश्वरी अजिमया द्यःया दुवा, बङ्गधर दुवा व जयवागेश्वरी द्यःया दुवाः लाग्ना द्यःखः कुबिया हइगु खः । निखः द्यःखतय् छम्ह छम्ह मस्तय् छुरां सगू थें याना सुयातःगु दइ । क्वय् च्वना मेमेपिन्सं द्यःखः क्वबिया यंकी । अथे हे मेगु छ्खः द्यःखतय् धाःसा दक्ले च्वय् छम्ह मिजं मचा अले जवं खवं छम्ह छम्ह मिसा मस्तय् छुरां सुया प्वाथं पिकयातःगु थें याना तइ । थुगु जात्रा नेपाल संवत् २३४ सालनिसें सुरु जुगु खः धकाः धाइ ।

## बाघभैरवया जात्रा

सूर्यमास कथं हना वयाच्वंगु छ्गू जात्रा खः किपूया बाघभैरव द्यःया जात्रा । दैय् दसं भाद्र १ गते सिंहसंक्रान्ति धकाः बाघभैरव द्यःया मूर्तियात खटय् तया कुबिया जात्रा याइगु चलन दु । न्हापा न्हापा बाघभैरव द्यःया नामय् हिफःद्यःयाथाय् पुजा आजा याना पञ्चबली बिङ्गु याना वयाच्वंगु खः । थौकन्हय् तर्क नं अथे हे पुजा आजा याना वयाच्वंगु दुसा विक्रम संवत् २०१३ सालनिसें धाःसा बाघभैरव द्यःया मूर्ति खटय् तया जात्रा यायेगु सुरु याना हःगु दु । थुगु जात्रा बागू सताब्दीया दुने भव्य जात्राया रुपय् हिला वंगु दु । सांस्कृतिक बाजं थाना तःजिक जात्रा याना वयाच्वंगु दु ।

## गथांमुगः नखः

दैय् दसं दिल्लागा चःहे खुन्हु हनीगु थुगु नखः नाप स्वापू दुगु गथांमुगःयात थीथी कथंया व्याख्या याना वयाच्वंगु दु ।

गथांमुगः नखः भिंय्प्यंगू शताब्दीया इलनिसें हे न्ह्याका वयाच्वंगु नखः खः धकाः तर्क धया वयाच्वंगु दु । वास्तवय् गथांमुगः नखः हनेगु अले भूत वायेगु धइगु सिनाज्या अर्थात वा पिङ्गु ज्या क्वचाये धुंकीपिन्सं जक याइगु खः । सिनाज्या क्वचाःगुया संकेत बिङ्गु कथंया नखः गथांमुगः नखः धायेफइगु अवस्था दु । गथांमुगः नखः तकया दुने नं वा पिङ्गु ज्या क्वमचाल अले गुन्हुपुन्हि खुन्हु तकया दुने क्वचाल धाःसा गुन्हुपुन्हि खुन्हु हे थःथःगु छेंय् नं भूत वाये यंकीगु चलन दु । उकिं नं सिनाज्या क्वचाल धकाः हनीगु नखः हे गथांमुगः खः धकाः धायेफइगु अवस्था दु ।

उलि जक मखु त्वाः त्वालय् दुवातय् थनीगु अले लुया यंकीगु गथांमुगः धइगु त्वाःया फोहरयात भूतया प्रतिक दयेका यंकीगु कथं नालातःगु दु । त्वालय् हे दयाच्वंगु न्हय्पं कथिया कलात्मक कथं भूत दयेका वाये यंकीगु खः । छ्गू कथं फोहरयात विषर्जन याइगु खः । अले थःथःगु छेंय् नं न्हाकं, च्वाकं नापं थीथी कथंया कं नापं घाँय् तया च्याका वाये यंकीगु धइगु नं सर सफाइ याइगु हे खः । न्हापा न्हापा जूसा वा पिङ्गु नितिं लच्छि तक लगातार रुपं बुँड वनाच्वनीगु अले थःगु हे छेंय् त्वालय् बुया वयाच्वनीगु थीथी कथंया घाँय्यात भूत नाला वाये यंकीगु खः धकाः नं धाइ । थ्व नितान्ति बुँज्या नाप स्वापू दुगु अले फोहर नाप स्वापू दुगु अफ्फ धाये सर सफई याइगु नखःया रुपय् कायेमाःगु अवस्था दु । न्हापा न्हापायापिं मनूतय्सं फोहरयात विषर्जन यायेगु दिं हे क्वःछिना अथे गथांमुगः नखः सलंसःदैँ न्ह्यःनिसें नेवाःतय्सं हना वयाच्वंगु नखः खः धकाः नाला कायेफु । उलि जक मखु मूल ज्या कथं नालातःगु वा पिङ्गु ज्या सिनाज्या क्वचाल धकाः घोषणा याइगु अले मनोरंजनया नितिं गुंला लाखे पिकायेगु ई वल धकाः बिङ्गु संकेत खः गथांमुगः नखः । उकिं हे जुइमाः गां गामय् आः तर्क नं गुगु थासय् वा पिङ्गु ज्या याइपिं यक्व नेवाःत दु अर्थात बुँज्या याइपिं नेवाःत दुगु थासय् गथांमुगः नखःनिसें बहनी बहनी लाखे पिथनेगु तर्क याइ । ( सुक्रवाःया तसापौ नेपालभाषाया वाःपौपाखें)

## साहित्य उपन्यास – जन्ति न्त्यात

**चमि— मदन गोपाल प्रधान “क्वाःघासा”**  
कथहं .....

“नये का । छन्त लिसा तये मालितिनि धकाः मतानागु ।”

“छु नं लिसा म्वाःल । मांया भपिया दिसँ ।”

जा ताना हयाः मनमाया थः काय्या लिक्कसं फ्यतुत । मां काय् निम्हं नया च्वन, निम्हेसिया मनय् थःथःगु खँत तयाः । मनय् खँ तया नयाः च्वंम्ह मनमायाया कथुइ जा थाःथें च्वं । छप्यय् निप्यय्जा लखं क्वथिनाः नल । तर थ्व वया बानि मखु । माःगु खँ मल्हासे च्वने फुम्ह नं व मखु । मनय् खँ ल्हाकाः जाप्यय् पतिकं लखं क्वचिना नये नं वया मयः । जा नया च्वंम्ह श्रीयात स्वयाः वं धाल, “धाथें छु व मिसामचा छन्त मयःला? मयःसा मयःधा । मखु, छं सुं मेपिं दुसा अथे हे धा । खँ क्वःजिकाः छवःये । छाय् म्वाफतय् लमियात जक दुःख ?”

आःला लिसः दैला धयाथें मतिइ तयाः थुलि धयाः मनमाया दित । तर श्री नं नि मवाः । मांम्हेसियागु खँ जक न्यना च्वन । थःगु न्त्यसःयात च्यूताः मतःसे छुं छां हे मधाःसे च्वंगु खनाः नये त्यंगु जाप्यय् ल्हाःतिइन्तुं तयाः मनमायां धाल, “स्वः बाबु, गुलिनं जिं सनाजुया व फुक्क छंगु लागि हे खः । आः थ्व नं छंगु लागि हे धया च्वनागु खः । आम्हे सुंक च्वनाः छु छं जितः ही माय् चायेकेगु बिचाःला ?”

“मांयात ही माय् चायेकां जितः छु दइ ?”

“जिं छु स्यू । छं हे स्यू का । मखुसा छाय् ननि मवासे सुंक च्वनाः खँ जक त्वना च्वनागु ? उई थें जि जक पारापारां हाला च्वने माःगु ला ?”

मांम्हं नुगलय् स्याकल जुइ धयाथें मतिइ तयाः ह्येकेगु कतः खतं श्रीं न्हिला धाल, “जिं मयः धकाः मधया थें । मां नं जिगु मनया खँ सीका काल जुइ धकाः च्वनागु । अय् जुया छुं नं मधयागु । मांयात यःम्ह जितः नं यः । आः हानं जिं छुं धाये मानि ला ?”

“नासः मदुम्ह मचा । थुलि खँ न्हाचः हे धाःसा मन्त्र मगाःम्ह बोक्सी थें हाले मालिइ ला जि ?” धयाः चकं मनं जा प्येय् म्हुतुइ तल ।

जा नये सिधयेकाः कसिइ वना श्री नुस्यू वन । नुसिलाः च्वंम्ह श्रीयात छकः मनमायां स्वत । हिन्हु पतिकं लसताया धाः न्त्याकाः जाः नल ।

नुसिले धुंकाः थामय् नकिनय् खायातःगु ख्वाःहुसां ल्हाः म्हुतु हुल । थः मांयात छकः स्वत । मनमाया थःगु हे सूरं नया च्वन । जा नया च्वंम्ह मनमायाया ल्हाः च्वः गबलें केंया वार्चाय्, गबलें तरकारिया रि कापि सा गबलें अचारय् ।

ल्हाः म्हुतु हुइ धुंकाः पलख दनाः बैगलय् छचाःखेर स्वत । अले क्वहाँ वनेत स्वाने पाखे स्याः वन । श्री कुने वने त्यंगु खनाः जा नया च्वंम्ह मनमायां धाल, “हिइ माःगु वसःत छु छु दु फुक्क मुंकाः छथाय् ति । वीर मैचा थौ वसः ह्यू वये धाःगु ।”

“हस् ।” धकाः श्री क्वहाँ वन । कोथाय् वन । न्हाय्कं छकः नि स्वत । अले कोथाय् छकः छचाखेर मिखा व्वयेकल । हिकेमाःगु फुक्क वसःत, तन्दा फुङ्ग, फाङ्ग, लासाया भुसात लिक्कया छथाय् व्दं मुंकल । दराजं यचुगु तन्दा छपू लिक्कयाः खाताय् लात । भुसा मदुगु फाङ्ग लथ्याना छिक्केयाना च्वंबलय् मनमाया कोथाय् दुहाँ वल । मुंकाः तःगु वसः व्दंय् मिखा छकः व्वयेकल ।

“हिके माःगु फुक्कं थुलि हे जक खःला ?” वाय् कु कुं मनमायां धाल ।

“थुलि हे जक ।” धकाः श्रीं धाये मलाःनि कुने खापाय् ध्या ध्या याः सः ताये दत ।

“वीर मैचा वःगु जुइ । खापा चायेकाःब्यू ।” धकाः श्रीयात ज्या व्वयाः मनमाया वाय् कुलान्तुं थःगु कोथाय् वन । हिके माःगु वसःत मुंकाः च्वन । धिकिनं स्वानं थहाँ वयाः “ज्यनां सिधल ला, वजे ?” धाधां निपाल्हाः नं जयँ तयाः वीरमैचा मनमायाया कोथाया लुखा खलुइसं घिसिक्क धायेक दँ वल । फुङ्गया भुसा लिकाकां “धुन । छं नये धुन ला?” धकाः मनमायां मैचिके न्यन ।

“मनःसे वःसा बजेया जाकि पाः जुइका । से विया दिसँ, छु छु हिइ माःगु दु ।” मैचां धाल ।

“वीरमै तता साप हे खँ सःथें च्वं ।” कोथाय् च्वंगु वसः व्दं मैचिया न्त्यने ततं श्रीं धाल ।

“खँ मसःसा त्वाः फवसा ह्वइका, श्री भाजु । हिइ माःगु फुक्कं थुलि हे मखा, वजे ?” वसः व्दं भयेच्यानाः मैचां धाल ।

“खः । उलि हे जक खः । ल्वः मं खःमं दःसा जिं ज्वना वये ।” मनमायां धाल ।

वसः व्दं व्यकुं च्यानाः मैचा कुने केवय् वन । मनमायां कोथाय् छिक्केछाके यात । श्री थःगु कोथायन्तुं दुहाँ वन । भ्यालं क्व स्वत । पिने त्वाल्य वया मनं खीपिं सुनं खने मदु । सुथवःछि लासा प्वाल्य च्वनाः थन वने अन वने धकाः बिचाः यानाः च्वंम्ह श्री थन हे वनेगु धकाः धाये मफयाः कोथाय् लिरुथिरु जुया च्वन । न्हिछि यंकं छें नं छु जक यानाः च्वनेगु धयाथें मनय् खँ बायेकाः च्वन ।

थःगु कोथा सुचुकेपिचुके यानाः मनमाया श्रीया कोथाय् वल । मांम्ह वःगु खनाः सखे हानं वहे मिसा मचाया खँ ल्हायेत वःम्ह जुइ धयाथें मतिइ तयाः श्री फ्यतुत, मांम्हेसियागु म्हुतुं पिज्जइगु खँ न्यनेत थिकथाक् जुया च्वंम्ह थें च्वंक । धायेम्वायेक मनमायां खँ छुतं नं श्रीं तायेकू थें व हे मिसा मचाया बारय् ।

“म्हेनि स्वयेगु ला कि जातः त्वःमत्वः निं केनेगु धकाः लमिं खँ न्त्यथं बलय् म्ह स्वये धुंकाः जातः क्यने मालिइ धकाः जिं धया छवया । सखे थौं कन्हय् हे जातःया तिपनि ज्वनाः म्ह स्वयेगु दिं नं थुबलय् जुल धकाः सुचं ब्यू वइ ।” मनमायां धाल । “त्वः मत्वः नं क्यने माःगु ला ? जातः मस्वःसां मज्यूला मां ?” खँय् खँयन्तुं श्रीं धाल ।

“मज्यू । मज्यू । जातः मतुइकं थयाःगु ज्या खँ याये मज्यू ।”

“छुं गथें जुयाः जातः मतुल धाःसा मांया यःम्ह भौमचा छखे लाइ नि ।”

“अथे हे जूसा जिगु कर्मय् हे मदुगु धकाः मन तये मालिइ ।”

“अथे खःसा जातः तू मतू निं क्यने माल । जातः मतूसा ययां जक छु यायेगु ?”

“आम खँ नं पाय्छि हे जू । जातः मतुइकं म्ह जक स्वयां ज्यूगु मखु । म्हला किपाय् सां स्वय् धुन । लिपा स्वये नं मज्यूगु मखु ।”

“अयसा मांया छु बिचाः ? म्ह न्हापां स्वयेगु ला कि तू मतू निं केनेगु ?”

“आसे तिपनि हयेके निं ब्यू । अले बिचाः याये मालिइ । हिके माःगु छु ल्वःमंगु दुला ? मखुसा जि क्वहाँ वने त्यल ।” हिइमाःगु मिसा लं छपाः ल्हातिइ व्वयाः मनमायां धाल ।

“मदु । छुं नं मदु । फुक्कं विया छवःये धुन ।” लं छपा ज्वनाः मनमाया कुने वन । न्त्यने अंगःपाखे स्वयाः श्री घौपलख वातां दना च्वन । भचा जायेका खाताय् फ्यतुत । मनय् छुं बायेकूम्हं थें बिचाः यात । खाता तलय् च्वंगु सुत्केस सालाः मुलय् दिकाः चायेकल । सुत्केस चायेकतवं वया मिखा सिखः म्हाः दुगु चिकिचा ग्वःगु वताचाय् वन । वता चायेकाः सिखः म्हाः छकः तुंक स्वयाः सुत्केसय्नतुं तल । खाता तःलयन्तुं सुत्केस तयाः दन । पिने वनेत वसः पुन । सँ छकः छयन । खापा तिनाः कुने वन । कथहं .....

हलिं नेवाः गुथि किपू कचां किपुली याःगु “भिके-ल्ट्वने-न्हूधाः यायेनु”छयों तया चिनाखँ गोष्ठी ब्वंगु चिनाखँ छसिंकथं पिकया वनेगु तातुना थ्व चिनाखँ न्त्यव्वयागु खः

### ५२.ह्यूपाःया संग्राम

**श्रीकृष्ण तण्डुकार**

**लाय्कू, किपू**

ह्यूपाःया संग्राम पूर्वनाः नं पूमवंगु म्हगस जुयाच्वन यः मयःगु जनमतया होमय् शहीदया हि लनाच्वन ।

बुद्ध दयेकुगू लँपु बन्दुकया गोली पःखा दनाच्वन रणभूमिइ क्रान्तिया नामय् अभिमन्यु यात चक्रव्युह त्वाःथलेगु लँ क्यनाच्वन । कृष्णया शारथी अर्जुन जुयाः भिष्मयात रणभूमिइ सालाः गान्दिव कृष्णं ज्वनाः यः-मयःगुया चिं कियाच्वन ।

वाणया शैया दयेकाः भिष्मयात गंगा क्यनेगु कुतः यानाच्वन पाण्डव व कौरवयात थःगु थाय् क्यनाः देय्या लू कियाः कृष्णं आधुनिक महाभारत मञ्चन यायेत स्वयाच्वन ॥

### ५३. भी दनेमाःगु दु

**राज्यरत्न बजाचार्य,**  
**अमल्सि, किपू**

भयावह, आक्रान्त भीगु देय् नेपालय्क कलकल खुसि न्त्याःथें तिकितिकि हायाच्वन ख्ववि गरीव, दुखी जनताया अथेसां म्वायेत बाध्य गुलिसिया सुकूचिंगु प्वाः ज्वनाः गुलिसिया भुलिभुलिगु लं फिनाः थःथःगु तालय् ब्वाँय् जुयाच्वन छछाः नयेगु निंतिं छजु पुनेया निंतिं तर बिडम्बना २१ गू सदि थ्यंकाः नं १८ गू सदिया न्हाय्कं क्यनातल वर्ग संघर्षया नामय् जनता ल्वाकाः सीमित वर्गतय्सं थःगु स्वार्थया निंतिं थःगु इमान, मर्यादा व इज्जत बःहः तयाः न्हिलाः न्हिलाः म्वानाच्वन । तर छु याये खबरदारी याइपिं मदु नं पतिं धस्वाकाः जनता नं मौन उमिगु कठपुतलि जुयाः धाःधाःथें प्याखं ल्हुयाः सुकूचिंगु प्वाः हे भ्नाः ल्वःमंकाः नांगाः भांगाः जुयाः नं लाज हे तंकाः अलय्, शक्ति जुयाः बिल थ्वहे उमिगु निंतिं शक्ति छयल, ताण्डव यात लवः काल थुपिं सीमित वर्गतय्सं अथेसां न्त्यलं मचाः जनतां

उकिं दनेमाःगु दु जनता सीमित वर्गयात ख्यानाः छवयेया निंतिं सुकूचिंगु प्वाः थनेया निंतिं नंगांगु म्ह त्वःपुइगु निंतिं कठपुतली मजूसे थः हे सक्षम जुइया निंतिं भीत भीगु हे थाय् माः, लागा माः भीत स्वायत्त राज्य माः थःगु अधिकार सुनिश्चित यायेया निंतिं अथे जुयाः भी भी जुया दनेमाःगु दु ।

### ५५.सुर्घःया आजुयात पनेफइ

**मखु**

**रमेश महर्जन**

**थांबहाः, किपू**

खुसियात न्त्याक्व हे तःजाःगु वं दयेकाः थपनेमा खुसिया न्त्यावनेगु गतियात ता ईतक पनेफइमखु छाय् धाःसा, खुसिया मेगु रुप धइगु हे गतिशिलता खः विशाल समुद्रय् थः समायोजन जुइगु हे खुसिया छगूया छगूजक आजु खः सुर्घःयात न्त्याक्व हे ख्वातुगु सुपाचं भुनेमा सुर्घःया जः ह्वलेगु नियमयात ताईतक चिनातये फइमखु छाय् धाःसा, सुर्घःया मेगु रुप धइगु हे च्यानाच्वंगु मि खः चार्कलं लुमुगु व यचुगु जः ह्वलाः ख्युंगु कुलांयात जहां थिइकेगु हे सुर्घःया छगूयां छगूजक आजु खः

**छिगू नं चिनाखँ,  
बाखंनिसें छुं नं कथंया  
च्वसू दुसा बियादिसँ  
जिमिसं ल्वःकंह्वाःगु  
ज्वजलपा वाःपतिइ  
पिकायेगु जुइ ।**



**ज्याकूः निखासी त्वाः  
किपू नपा-३  
फोन ल्याः ४३३३००७,  
९८४१४०१०७७  
ई-मेल :**

kirtipur\_sandesh@live.com



## मिस एसिया नेपाल-२०१७ किपूया एलिना महर्जन

रिदेन महर्जन

किपूया म्हाय मचा एलिना महर्जन मिस एसिया नेपाल – २०१७ य छनौट जुइत ता:ला:गु दु । ख्वहे वइगु असार २३ गते यँया होटल न्याडिसनय जुइगु उगु कासाय २० म्ह मयजुषिमध्ये ११ म्हेसिगु ल्यज्याय लायेत मयजु एलिना महर्जन ता:ला:गु ख: ।

थुगु कासाय छम्ह जक अप्ठ: भोटिडया लिधंसाय ग्राण्ड फाइनलिष्ट छम्ह मिस एसिया वर्ल्ड श्रीलंकाय नेपा:पाखे प्रतिनिधित्व यायेखनी ।

एलिना महर्जनयात SMS VOTING यायेगु नितिं MAN <space> 09 send to 33001 याना भोट बिइफइगु जानकारी सार्वजनिक या:गु दुसा एलिना महर्जन कन्टेष्ट ल्या: ९ ख: । एलिना महर्जन किपूया १० वडा त:ननी त्वालय च्वनादीम्ह थौकन्हय किपूया न्हूवजा: १० वडाय च्वनादीम्ह दिल कुमार महर्जन व निर्मला महर्जनया म्हायय ख: ।

एलिना २०५० कार्तिक २७ गते जन्म जूगु ख: । एलिना बि.सं. २०६५ सालय ज्ञानकुञ्ज स्कूलपाखे एसएलसी परीक्षा बियादीगु ख: । थौकन्हय किष्ट मेडिकल कलेज टिचिङ हस्पिटल ग्वाकोँ यलय प्यंगूगु दँय अध्ययन यानाच्वनादीम्ह एलिना महर्जन म्ये हालेगु, न्हून्हुगु थासय चा:हिलेगुलि नं नुग: क्वसा:म्ह ख: ।



## किपूया युवातयूत व:गु अवसर

- नेवा: एफ एमया ज्याभ्व: न्ह्याकामि जुइत
- नेवा: एफ एम १०६ दशमलब ६ या प्राविधिक जुइत
- बजार व्यवस्थापक जुइत

## स्वापू तयादिसँ

ज्वजलपा वा:पौ व कीर्तिपुर सन्देश

साप्ताहिक फोन नं. ४३३३००७

९८४१४०१०७७ व ९८४१७५२५८३

## नेपालभाषा परिषदं थीथी सिरपा ल:ल्हात



ज्वजलपा वा:पौ /

नेपालभाषा परिषदं दँय दसं थें थुगुसी नं थीथी कथंया सिरपा: ल:ल्हा:गु दु । न्हापांखुसि नेपाल प्रज्ञा प्रतिष्ठानलिसे जाना मंका: कथं ज्याभ्व: याना अथे सिरपा: नापं उपाधि ल:ल्हायेगु ज्या या:गु ख: । कविकेशरी चित्तधर 'हृदय' या १११ क्व:गु बुद्धिया लसताय वंगु सोमवा: यँय छगू विशेष समारोहयासँ थ्व दँया चित्तधर 'हृदय' सिरपा नेवा: अमेरिकन दबु सिकागो अमेरिकायात ल:ल्हा:गु दु ।

उगु सिरपाया राशि २५००० तकाया ख: । नेपाल राजकीय प्रज्ञा-प्रतिष्ठान व नेपाल भाषा परिषद मंका: खसालय जुगु उगु ज्याभ्वलय प्रतिष्ठानया कुलपति गङ्गाप्रसाद उप्रेती उगु सिरपा ल:ल्हा:गु ख: ।

ज्याभ्वलय नेपालभाषाया बाखँ च्वमि मथुरा सायमियात 'भाषा थुवा'या साहित्यिक उपाधि विभूषित या:गु ख: । नेपालभाषाया निबन्धकार ठाकुरलाल मानन्धरया लुमन्ति स्थापित ठाकुरलाल सिरपा निबन्धकार योगेन्द्रमान श्रेष्ठयात ल:ल्हा:गु ख: । उगु सिरपाया राशि रु १५,००० तकाया ख: ।

अथे हे मोतीलक्ष्मी सिरपा बौद्धविद्वान् डा. रिना तुलाधरयात ल:ल्हा:गु ख: । उगु राशिया १५,००० तकाया ख: ।

नेपालभाषाया साहित्यकार पूर्णकाजी ताम्राकारया लुमन्ति निस्वनात:गु पूर्णहिरा सिरपा यलया साहित्यकार रोहिणीबहादुर कायस्थयात ल:ल्हा:गु ख: । उगु सिरपाया राशि २५,००० तका ख: ।

उगु ज्याभ्वलय नेपालभाषा एकेडमिया चान्सलर चित्तरजन नेपाली मू उपस्थिति जुगु ख:सा ज्याभ्व:या नेपाल भाषा परिषद नाय: सुवर्ण शाक्यया सभापतित्वय जुगु ख:सा लसकुस परिषद छयाञ्जे नवीन चित्रकार यानादिगु ख: । ज्याभ्वलय नेपालभाषाया साहित्यकार, नेपालभाषा ख्य:या कार्यकर्तात तकं उपस्थितिइ जुयादीगु उगु ज्याभ्वलय थीथी व्यक्तिपित्सं न्ववानादीगु ख: । ज्याभ्वलय नेपाल प्रज्ञा प्रतिष्ठानया कुलपति गङ्गाप्रसाद उप्रेती बाहेक मेपि फुक्क धाइथें हे नेवा:त दुगु अवस्थाय नं नेपालभाषा परिषदया नाय: सुवर्ण शाक्यं खय भासं न्ववानादिल धका: नेवा:तयसं कुखिनादीगु ख: ।

